

Madrileko Gobernuari buruzko negoziaketak

EAJ prest da PSOErekin ituntzeko alor jakinetan autonomia gordez

Gakoa hitzarmenaren mamia dela dio Arzalluzek eta ez, ordea, forma

Egitarau nagusiak PSOErena izan behar duela onartuta, EAJ prest dago Gonzalezen gobernuari egonkortasuna emango liokeen ituna hitzartzeko, zenbait alorretan bere kasa jokatzeko ahalmena gordez. Egunotan izango den bilerara Xabier Arzalluz ezezik Jose Antonio Ardanza ere joatekoa da.

I. URIARTE / BILBO

EAJk ez dio eskatuko Felipe Gonzalezi alor guztietan adostasuna izaterik bien arteko hitzarmena lortzeko. PSOEren egitarauak, alderdi nagusiarena, eztabaidarako ardatz izan behar duela onartuta zabalik utzi zuen aukera alor jakin batzuetan alderdi bakoitzat bere ildo politikoa berezitua aurrera eramateko.

«Guk ez dugu defendituko sekula ere Armada profesionala izatea, edo ez gara joango Matilde andrea abortoarean gaian heldu den edo heldu nahi duen tokiraino». Hala eta guztiz, «hitzarmena ez da gauza guztietan ados egotea, hori alderdi bakar bat egitea baita» argitu nahi izan zuen Xabier Arzalluzek.

Gasteizko koalizio gobernuan izandako esperientziaz baliatuz, burukide jeltzaleak gogorarazi zuen alor batzuetan bere jardura politikoa bereiztua daukela. «Nik ez dut geure egitaraua onartarazteko asmoa, eta ez dut uste katalanen asmoa hori denik ere. Lan egiteko borondatea baldin badaukagu zerbait utzi beharko dugu denok» aitortu zuen.

Euskararen adibidea jarri zuen esateko PSOEK «Gasteizko Gobernuan egiten duena zenbaitentzat kritikagarria den arren, sozialisten asmoetatik urruti» da goela.

KOALIZIOAREN KULTURA HEDATU

«Ez dugu porrot egin nahi, eta horretarako jakin behar dugu nora goazen. Hitzarmen bat egitean, gobernuan egotea edo ez bigarren mailako gauza da» nabarmendu zuen Arzalluzek. Gakoa, hortaz, ez legoke hitzarmenak hartuko duen egiturari, hitzarmenaren bat sinatzearen egokitasunean baizik.

Hurrengo urteetan datorkeen krisi ekonomikoaren larritzeak eta PSOEren barneko tirabirak balizko itunerako urratsak ondo neurtzera eramanez EAJ.

Gauzak horrela, Arzalluzek iragarri zuen aurrerantzean ne-



Arzalluzek eta Ardanzak zeren inguruan hitzartu behar den argitzea eskatuko diote Gonzalezi.

SIMAL

✓ Arzalluz: «Ez dugu porrot egin nahi, eta horretarako jakin behar dugu nora goazen. Hitzarmen bat egitean gobernuan egotea edo ez bigarren mailako gauza da».

kez egongo dela Madrilen gehiengo osoko gobernuari. «Orain gaude koalizio kultura bat eraikitze hastapenetan, eta hori izango da normalena». Arzalluzek berretsi zuen koalizioa oraingo legeegintzaldian egiten ez bada hurrengoan izango dela, «lan egin beharko da herria gobernarri egiteko» esan zuen.

Burukide jeltzaleak balizko gobernu hitzarmena eta Kongresuko zein Senatuko mahai eta batzordeetarako egin daitezkeen akordioak bereiztu zituen. Hau dela eta, gomutarazi zuen Jaur-laritzaren gobernu koalizioa bideratzeak hiru hilabete eraman bazuten ere, ordurako Parlamentuko tresnak osatuta zeudela.

IRITZI DESBERDINAK EAJ-N

EBBko lehen-dakariak ez zuen ukatu alderdi barruan hitzarmenaz jarraera desberdinak daudenik. «EAJn badago modu desberdinez pentsatzen duen jendea, eta logikoa da, gaia delikatu eta garrantzitsua baita».

Gonzalezekin mintzatu arte ez du argitu nahi EAJk hartuko duen jokabidea. «Erabaki hori ez nuke nahi koldarra izatea, eta ezta axolagabea edo ausarta», egoerak eskatzen duenaren arabera erantzukizun alikuota daukatela baino ez zuen esan.

Allik ez du koaliziorik ikusten

IRUNEA

■ Espainiarentzat «hoberena» Convergencia i Unio-ren egitasmoa gauzatzea izango litzatekeela uste arren, Juan Cruz Alliri ez zaio iruditzen Felipe Gonzalez gobernu koalizioaren bat osatzeko akordiora helduko denik. Nafarroako Gobernuak lehendakariak atzo azaldu zuenez, «CiUk ongi egiten du bere egitasmo osoa eskatzean, sendoena eta Espainian agintzeko baliagarriena da eta. Hala ere, hauteskunde sasoian egin duen demagogia ezkertiarra ikusita, PSOEK nekez onar lezake hori». Ondorioz, sozialistek CiUren aukera baztertu egin

beharko dutela gehitu zuen Allik: «Losintxetan ibili dira, baina azkenean andregai hori utzi egin beharko dute».

Litekeena, UPNkoaren aburuz, kolore bakarreko gobernu osatzea da. Horrela, sozialisten bakarrik aginduko dutela eta Felipe Gonzalezek uanean uneko akordioak negoziatu beharko dituela uste du Allik. «Minorian aginduko du», lehendakariaren esanetan, «horrek dakarren ahultasunarekin, zeren gainontzeko alderdiek bestelako gehiengo osoa dezakete noiznahi eta horren arabera jokatu behar da». Allik berak ongi ezagutzen du egoera hori, Foru Parlamentuan 20 par-

lamentari besterik ez dituela ari baita agintzen Nafarroan.

Gonzalezek bere balizko gobernuakideak konbentzitzea «oso zaila» iruditzeaz gain, Allik ez du argi ikusten PSOEren boto emaleek hori nahi dutenentz. Lehendakari nafarrak azpimarratu zuenez, «Gonzalezek eskuinaren mehatxua erabili zuen hauteskunde kanpainan ezkerreko indarrak bere inguruan biltzeko. Ezkerrera itzultzeko keinu horren bidez lortu zuen gehiengo eta, horregatik, ez dakit bere hautesleok zer pentsatuko duen orain, zentro-eskuineko alderdiekin hitzarmenak egin nahian dabilenean».

Kontseilu Nagusia Paben bilduko da gaur aurrekontua onartzeko

M.E. / PABE

Gaur eta astelehenean, Paben bilduko da Pirinio Atlantiar departamenduko Kontseilu Nagusia aurtengo aurrekontuaren bigarren zatia bozkatzeko. Lehen zatia urte honen hasieran onartu zuten: 2.000 milioi liberakoa (42.000 milioi pezeta) zen. Gaur eta astelehenean, 224 milioi liberakoa (4.725 milioi pezeta) aurrekontua erabakiko dute Ipar Euskal Herriko eta Biarnoko kontseilariak. Hil honetan erabakitzen den aurrekontua ez da garrantzitsua. Hala ere Ipar Euskal Herriari dagokionez, hainbat gauza onartu beharko dituzte kultura, ekonomia eta gizarte sailetan.

Kultura eta elkarteentzako bostgarren batzordeak aurkezturik, puntu inportantea tratatuko dute Seaskari buruz. Ikastole-tako ikasleak garraiatzeko aspaldiko arazoa aipagai izanen da bilera honetan, Kontseilu Nagusiko egoitzan.

Seaskaren garraioa kontuan hartu beharko du Kontseiluak. Seaskari, azken urte hauetatik 250.000 liberakoa (5,25 milioi pezeta) diru laguntza eman arren, orain arte Kontseilu Nagusiak ez zituen onartu nahi garraio gastuak. Arazoa agertzen da batez ere Kanboko Xalbador Ikastegiko ikasleentzat. Hain zuzen ere Kanboko kolegioa eta lizeoa bakarria da Ipar Euskal Herriko ikastola guztientzako ikasleentzat. Beraz ulertzen da hara joan behar duten ikasleek arazoak dituztela.

Ekonomiari dagokionez, urte honen hasieran, Kontseilu Nagusiak finkatu zuen industri guneei buruzko estrategia berria aplikatu behar luke datorren astelehenean, eta hau lehen aldikotz. Diru laguntza emateko sistema aldatuko dute. Kontseiluak garapen guneak sostengatuko ditu eta lantegia eraiki nahi duten sozietateak ere bai. Sistema honen aurretik, diru laguntza ematen zien udalei industri guneak gauzatzeko, enpresak jartzeko xedea izan edo ez izan. Azken finean, gizarte sailean, Kontseilu Nagusiak etxebizitza sozialentzako aurrekontua gehituko du, Iparraldeko hamabi xedeei diru laguntzak emanez.